

四明叢書

張宗祥



六經堂

遺事

四明張氏釣園開雕

序

有明之季吾鄉世家子弟起義不成以身殉國者若鏡

川楊氏

推官文琦兄弟四忠

西湖陸氏

按察副使字燦

砌街李氏

禮部主事

櫛

西城董氏

監軍德欽

芍藥汴錢氏

大學士蕭樂兄弟四忠

江北屠氏

職方主事獻宸

難僂指數壽鏞訪其遺書或存或亡歎當時文

網之密實足見其子孫之賢否也屠君用錫輯其八世

族祖天生大理詩及傳記爲一卷以其所居別署題之

曰六經堂遺事來請序乃述之曰大理原名懿忠更名

獻宸爲太保襄惠公瀟六世族孫少保簡肅公僑從玄

孫兵部侍郎大山爲其曾祖辰州知府本峻爲其王父
寧州同知惟霖其父也幼有大志出陳忠貞公良謨之
門甲申之變結集縉社一時巨室子弟皆預焉江南又
亡乃西探行省消息道出姚江則孫嘉績熊汝霖已起
兵杖策謁軍門畱參其軍錢忠介公肅樂會師江上忠
介執其手曰君可謂先平陰之役而鳴者也大理募義
從爲營軍於瓜瀝授車駕主事江上師潰角巾歸里初
慈谿馮尙書元飈兄弟門下多奇士參豫北將諸幕大
理欲因其力有所圖時海道中營游擊將軍陳天寵仲

謨者北人也奪大理所居之半居之馮氏客因說焉二將軍者願自效詣密室遂定盟於是華過宜夏頻乞師於翁洲內外合約以復浙東事泄大理與過宜皆被執戊子五月二日死於鄆之譙樓下監國贈大理寺丞大理在獄語董若思德欽曰過宜不用僖負羈之言以至此也若思最與過宜厚亦咎過宜雖異詞以謝不能無拂於中全謝山謂讀過宜對簿錄見楚石之壯而不諒天生若思之心長逝者之屈其有窮乎夫見義則爲何計利害害既至矣復何所諉其所謂念錯求生致家焚室

慘者惜之之詞也所謂力卸嫁罪非復平時激昂態者
欲圖養以有爲也非謂之也大理獄中詩曰血痕甘化
碧寧復畏災屯嗚呼求仁而得仁有何怨乎壽鏞刻過
宜言成適用錫亦攜冊來爰書其家世事蹟而論述之
如此以見吾鄉世家忠義之盛而用錫數典不忘其祖
實超乎尋常也民國二十三年一月後學張壽鏞序

明兵部主政天生公遺像



敬題遺像

從孫繼序


生負讀書養氣優一心夢寐爲神州祖生擊楫中流誓
翟義捐軀夙願酬奕世華簪難報國盟天白馬不回頭
丹青似解忠良意寫出鬚眉滿肚愁

同時殉義有華夏楊文泣血椎心各慨慷生慕包胥能

復楚死留精衛欲填滄離鴻哀調酸難讀配朱宜人紫


燕輕衫暗自傷公臨難時脫所服海青東浙山川多烈

士芳名海闊與天長



前部方主天屠諸朱安之
兵職司政生公封人墓

墓圖



兩浙防護錄明兵部職方主事屠獻宸墓獻宸鄞縣人與楊文瓚同死妻朱氏殉之國朝乾隆四十一年賜諡烈愍在縣北一里陶家河之南用錫案公墓與少司馬竹墟公墓同入防護錄卽在竹墟公墓之後族人公葬之其地卽莊基也民國九年春滬杭甬鐵路謀擴軌道少司馬及公墓均被劃入族人大譁推用錫及芝泉友杏時遜倬雲爲請求代表時用錫方旅燕先慈張太夫人以忠魂烈骨之所繫郵命力因徧謁旅燕同鄉由李贊侯思浩張詠寬壽鏞協力

請求交通部並電旅滬同鄉會張讓三美翊同爲陳
說更由諸宗老請於省路局及地方長官始得依據
保存古蹟條例蒙部檄令鐵路局繞避於是少司馬
及公墓永獲保存更修祀事爰繪墓圖俾有攷焉

屠董二君子合狀

全祖望

嗚呼古今殉國之士至於唐睢陽之六忠烈矣然觀張公所以語南八者惟恐同事諸君之死之不決而許公死于偃師稍晚遂起張公之疑向非後死者力爲表之將竟不免於議論矣惟段公倒用大司農印如岐如劉如何各不相引而卒之各相報以死偉哉殘明吾鄉戊子之難過宜華公爲之慙顧華公所紀對簿錄頗若不滿於屠董二君子而獨推楚石楊公之慷慨子詳考之華楊之抗詞不屈良不愧張公而屠董之心亦未嘗有

媿於許公特其形迹之間有須暴白者遂不得比於段
岐一輩爲可惜也予旣爲華公夫婦合狀又爲楊公兄
弟娣姒合狀偶繙對簿錄懼屠董大節之有晦也乃更
作二君子合狀世有韓退之或採予文以當于嵩之考
證未可知也

駕部屠公獻宸字天生鄞人兵部侍郎大山之曾孫推
官董公德欽字若思鄞人兵部侍郎光宏之孫一家並
以甲第雄於甬上稱世臣天生與若思皆負高才講氣
節江南之亡也若思納衣巾於文廟慟哭時鄞之義師

尙未動天生西向蕭山探行省消息聞潞王降而歸道
出姚江則孫熊二公已舉兵天生杖策謁軍門二公奇
之留參其軍事次日過宜華公等亦與若思擁錢忠介
公起兵于鄞會師江上忠介執天生手慰勞之曰君可
謂先平陰之役而鳴者也天生募義從爲小營軍于瓜
瀝之龍王堂前尋授車駕主事若思亦以招軍輸餉功
在六狂生之亞授監紀推官不受已而江上事壞竝角
巾歸里先是故尙書慈水馮公鄴仙兄弟門下多奇士
至是多在大帥幕中天生欲因其力以有所圖客頗許

之天生之居故侍郎第也北來諸將奪其半以爲署有海道中營遊擊將軍陳天寵仲謨者北人也馮氏諸客瞰知其有異微說之二人乃請詣天生密室屏左右言曰吾二人故史閣部麾下也當江都失守閣部垂死遺言屬我輩必無負明室吾二人敢忘之哉將有所待而爲之以報閣部也吾觀公非凡人且一切來往蹤跡吾亦稍覺之公若弗疑願效死力天生聞之大喜天寵等卽從衣領中出史閣部牒示之曰儻城下有警吾縛備兵使者以予公矣於是過宜頻乞師於翁洲內外合約